



## Akcija SIPA i MUP-a Srbije



Sa privođenja osumnjičenih u prostorije SIPA



# Bety "pomela" 14 falsifikatora i dilera

**Clanovi ove kriminalne grupe sumnjiče se da su krivotvorili različite dokumente i svjedočanstva institucija BiH i Srbije • Trgovina marihuane**

Policajska akcija kodnog imena Bety rezultirala je hapšenjem 14 osoba, osumnjičenih da su pripadale organizovanoj kriminalnoj grupi koja se bavila falsifikovanjem dokumenata, ali i trgovinom droge, potvrđeno je iz Tužilaštva BiH i SIPA.

### Pretresi

Naime, provodeći istragu u predmetu Bety, otkrivena je organizovana kriminalna grupa čiji članovi nabavljaju, posreduju u nabavci, krijumčare i rasturaju marihuanu na području BiH. U istrazi je otkriveno da članovi ove kriminalne grupe takođe izrađuju lažni novac, kao i različite vrste diploma, svjedočanstava i drugih uvjerenja institucija BiH i Srbije.

Iz SIPA je saopćeno da su uhapšeni Z. M. (54), D. V. (47), V. M. (55), R. V. (36), D. A. (33), G. S. (40), M. N. (38), R. B. (35), S. D. (33), V. D. (27), V. Z. (28), A. Š. (21), A. P. (33) i J. M. (36) zbog organizovanog kriminala, šverca drogom, krivotvorenja novca i isprava, falsifikovanja isprava, navođenja na ovjeravanje neistinitog sadržaja, preprodaje droga, saučesništva i pomaganja.

Inače, ova akcija je provedena s pravosudnim organima i policijom Srbije, a osumnjičeni su uhapšeni u Sarajevu, Istočnom Sarajevu, Višegradu, Gacku i Trebinju. U okviru ove akcije pretreseni su stambeni i poslovni objekti na 18 lokacija na području Sarajeva, Istočne Ilidže,

Višegrada, Novog Goražda, Gacka i Trebinja.

### Dokumentacija

Prilikom pretresa pronađeni su i izuzeti predmeti koji mogu poslužiti kao dokaz u daljem postupku, i to veći broj mobilnih telefona, SIM kartice, eksterni nosači elektronskih podataka, falsifikovane diplome i svjedočanstva, obrasci i druga dokumentacija, određena količina marihuane, vaga i drugi predmeti.

Osobe lišene slobode privedene su u službene prostorije SIPA, gdje će biti ispitane, te predate na dalje postupanje Tužilaštvu BiH.

**D. P.**